

Adebar fa alarm pervi da mulestas sexualas

(cdm/fmr) Il post spezialisà Adebar fa alarm perquai che adina dapli uffants e giuvens en il chantun Grischun èn confruntads cun violenza sexualisada e cun «cyber-grooming». Quai scriva il post en ina communicaziun a las medias.

Adebar, il post per la sanadad sexuala e per planisaziun da famiglia, è activ en bleras vischnancas dal Grischun. Sin tut ils stgalims scolars fa Adebar prevenziun en dumondas d'abus sexual. Sco Adebar observa actualmain èn ils uffants ed ils giuvens adina pli exposts a tals abus causa la digitalisaziun. Adina dapli delinquentas e delinquents nizzegian l'anonimitad da la rait per s'avischinar cun intenziuns sexualas als minorens, l'uschenumnà «cyber-grooming».

La manadra dal post, *Susanna Siegrist*, constatescha en quel connex: «En l'instrucziun – e quai sin tut ils stgalims – rapportan ils uffants u giuvens adina pli savens da surpassaments en las medias socialas.» Quel svilup haja anc s'accentuà il davos onn. Perquai haja il post Adebar decidì da far ussa alarm. Era perquai che blers uffants e giuvens hajan tema dad ir u clomar per agid. *Corinne Rietmann*, pedagoga da sexualitad tar Adebar, explitga: «Sin il stgalim superiur èsi savens gia «normal» da survegnir maletgs da penis u dumondas fitg explicitas. Sco exempel numna Corinne Rietmann quel dad ina 5avla classa, nua che mo duas da dudiesch scolaras n'hajan anc mai survegnì in maletg d'in penis dad in creschì. «Talas cifras fan tema» – uschia la pedagoga dad Adebar.

Las mulestas sexualas èn tenor il post spezialisà gia fitg derasà, surtut tar mattatschas. Statisticamain èn gia var 50% dals giuvenils en Svizra pertutgads.

Perquai appellescha Adebar surtut a l'attenziun dals geniturs e creschids che duain accompagnar, cussegljar e sustegnair ils giuvenils en lur cumportament sin las raits socialas.